

K'jaan Sabah sedia kerjasama kepada universiti dalam R&D

KOTA KINABALU: Ketua Menteri, Datuk Seri Musa Haji Aman berkata kerajaan negeri sedia bekerjasama kepada mana-mana universiti tempatan dan luar negara yang ingin menjalankan penyelidikan dan kajian pembangunan (R & D) di Sabah mengenai potensi-potensi sumber alam semulajadinya.

Tambahnya, Sabah yang mempunyai kawasan tanah dan hutan yang luas serta kawasan perairan yang dalam, masih banyak yang perlu diterokai untuk menjana kekayaan sumber alam semulajadinya bagi pembangunan ekonomi yang boleh dimanfaatkan oleh kerajaan dan rakyat.

Katanya, antara tempat yang menjadi minat universiti-universiti tempatan dan luar negara untuk mengadakan kaji selidik ialah kawasan Lembah Danum dan Meliau Basin.

Musa, yang juga Menteri Kewangan berkata demikian dalam satu majlis perjumpaan dengan Timbalan-timbalan Naib Canselor, Timbalan-timbalan Rektor dan Dekan-dekan universiti-universiti tempatan dari seluruh negara di salah sebuah hotel terkemuka di ibu negeri kelmarin.

Perjumpaan itu diadakan sempena 'Bengkel Peranan Kolej Kediaman Dalam Pemajuan Prestasi Mahasiswa IPTA 2004' untuk semua institusi pengajian tinggi awam (IPTA) Malaysia, yang dihoskan oleh Universiti Malaysia Sabah (UMS).

Sementara itu, Musa berkata pihak kerajaan amat menghargai peranan institusi-institusi pengajian tinggi dalam melahirkan para graduan yang berilmu dan berkemahiran.

Menyedari betapa pentingnya pembangunan sumber manusia sebagai aset penting negara, pihak universiti juga perlu menitikberatkan kepada pembangunan minda pelajar agar mereka lebih memahami akan usaha-usaha yang dibuat oleh kerajaan untuk faedah rakyat.

Para graduan juga diharap agar tidak mudah terpengaruh kepada unsur-unsur negatif yang sengaja dibawa oleh pengaruh luar yang boleh menjejaskan kefahaman mereka terhadap kebaikan dan sumbangan kerajaan untuk pembangunan pendidikan dan kemajuan ekonomi rakyat dan negara.

Dengan penjelasan itu, katanya, para graduan dapat menilai akan kebaikan kerajaan yang terus berusaha membantu rakyat menikmati keselesaan hidup melalui pembangunan infrastruktur dan kerohanian secara berterusan.

Tambahnya, para graduan juga perlu dijelaskan akan usaha-usaha yang telah dan sedang dibuat oleh kerajaan untuk rakyat menikmati keselesaan hidup, kestabilan ekonomi dan keharmonian kaum ke arah pembentukan bangsa Malaysia yang maju.

Menurut Musa, kerjasama yang wujud antara kerajaan negeri dan pihak universiti perlu diteruskan demi faedah bersama dan kesinambungan pendidikan di negara ini.

Antara mereka yang hadir ialah Timbalan Naib Canselor UMS, Prof. Datuk Dr. Mohd Noh Dalimin, Prof. Datuk Dr Abdullah Al-Hadi Haji Muhamed (UPM), Prof. Datuk Dr. Razali Agus (UM), Prof. Madya Dr. Aminudin Yusof (UKM) dan Prof. Madya Dr. Kamaruzaman Mohamad (USM).